



**SAMOSTALNI SINDIKAT DRŽAVNIH SLUŽBENIKA
I NAMJEŠTENIKA U ORGANIMA DRŽAVNE SLUŽBE,
SUDSKOJ VLASTI I JAVNIM USTANOVAMA U FBIH
S A R A J E V O
- U P R A V N I O D B O R -**

Broj: 02- 1003-7/1/22
Tuzla, 09.12.2022. godine

Na osnovu člana 52. Statuta Samostalnog sindikata državnih službenika i namještenika u organima državne službe, sudske vlasti i javnim ustanovama u Federaciji BiH (prečišćeni tekst) broj: 03-054-3129/96, od 24.06.2022. godine, Upravni odbor Samostalnog sindikata na sjednici održanoj dana 09.12.2022. godine u Tuzli, donosi:

**U P U T S T V O
O PRUŽANJU PRAVNE ZAŠTITE ČLANOVIMA
SAMOSTALNOG SINDIKATA DRŽAVNIH SLUŽBENIKA I NAMJEŠTENIKA U FBIH**

Član 1.

Svi članovi i sindikalne organizacije Samostalnog sindikata državnih službenika i namještenika u organima državne službe, sudske vlasti i javnim ustanovama u FBIH (u daljem tekstu: Samostalni sindikat), imaju pravo na besplatnu pravnu zaštitu za sporove iz radno-pravnih odnosa u skladu sa ovim Uputstvom.

Član 2.

Besplatna pravna zaštita iz člana 1. ovog Uputstva, pruža se u sporovima iz radno-pravnih odnosa za:

- a) pravna zaštita pred sudovima na svim nivoima protiv rješenja rukovodioca organa državne službe, kojim su povrijeđena prava iz radno-pravnog odnosa člana Sindikata, a koja se odnose na: raspored na drugo radno mjesto, prestanak radnog odnosa, naplata novčanih potraživanja i doprinosa proisteklih iz radnog odnosa i ocjene o radu;
- b) pravna zaštita radi poništenja odluka o plaćama i naknadama državnih službenika i namještenika;
- c) pravna zaštita radi poništenja pravilnika o unutrašnjoj organizaciji i sistematizaciji ili plaćama i naknadama u organu državne službe;
- d) pravna zaštita zbog vršenja mobinga na radnom mjestu protiv člana Sindikata;
- e) pravna zaštita pred nadležnim sudom protiv rješenja drugostepene disciplinske komisije ili odbora za žalbe;
- f) pravna zaštita i zastupanje pred prvostepenom disciplinskom komisijom protiv rješenja o pokretanju disciplinskog postupka, koje donosi rukovodilac organa državne službe zbog teških povreda radne dužnosti,
- g) pravna zaštita pred drugostepenom disciplinskom komisijom ili odborom za žalbe radi poništenja rješenje prvostepene disciplinske komisije.

Član 3.

Član Sindikata kome je potrebna pravna zaštita dužan je da se pismenim zahtjevom za pružanje pravne zaštite obrati Samostalnom sindikatu putem sindikalne organizacije čiji je član, sa kompletnom dokumentacijom, čiji će zahtjev nakon dostavljanja zahtjeva za pružanje pravne zaštite od strane sindikalne organizacije razmotriti predsjednik Sindikata i odlučiti o načinu pružanja pravne zaštite podnosiocu zahtjeva, ukoliko je isti opravdan.

Član 4.

Pravnu zaštitu i zastupanje u prvostepenom i drugostepenom disciplinskom postupku pokrenutom protiv člana Sindikata u pravilu obezbeđuje Sindikalni odbor sindikalne organizacije u kojoj djeluje član Sindikata protiv kojeg se vodi disciplinski postupak.

Sindikalni odbori u sindikalnim organizacijama u saradnji sa predsjednicima Koordinacionih odbora pravnu zaštitu iz stava 1. ovog člana, obezbeđuju tako što će omogućiti da sjednici disciplinskog organa prisustvuje, te da izradi žalbu na odluku prvostepenog disciplinskog organa, diplomirani pravnik sa najmanje 5 godine radnog iskustva u struci, koji nije iz iste sindikalne organizacije kojoj član sindikata za kojeg pruža pravnu zaštitu pripada.

Ukoliko Sindikalni odbor sindikalne organizacije nije u mogućnosti da pruži pravnu zaštitu članu Sindikata koji mu se obratio pismenim zahtjevom za zastupanje u disciplinskom postupku, dužan je da se pismenim putem obrati Samostalnom sindikatu državnih službenika i namještenika u organima državne službe, sudskoj vlasti i javnim ustanovama u FBIH i dostavi kompletну dokumentaciju sa zahtjevom za zastupanje u disciplinskom postupku i pružanje pravne zaštite njihovom članu sindikata, koji će razmotriti predsjednik Sindikata, te ukoliko je zahtjev opravdan i radi se o težoj povredi radne dužnosti, odobriti zastupanje u disciplinskom postupku od strane diplomiranih pravnika koji su profesionalno zaposleni u Stručnoj službi Samostalnog sindikata državnih službenika i namještenika u organima državne službe, sudskoj vlasti i javnim ustanovama u FBIH.

Član 5.

Pravnu zaštitu iz člana 2. tačke a), b), c), d) i e) ovog Uputstva, u radnim sporovima pred nadležnim sudovima na svim nivoima obezbeđuje Samostalni sindikat državnih službenika i namještenika u organima državne službe, sudskoj vlasti i javnim ustanovama u FBIH, koju shodno odredbama Statuta Samostalnog sindikata obezbeđuje i odobrava predsjednik Sindikata.

Pravnu zaštitu u sporovima iz stava 1. ovog člana, koju obezbeđuje Samostalni sindikat, pružaće ISKLJUČIVO ovlašteni advokati od strane Samostalnog sindikata, sa kojima Sindikat ima sklopljen Ugovor o zastupanju.

Ukoliko član Sindikata, koji je podnio zahtjev za pružanje pravne zaštite nije saglasan sa advokatom kojeg mu je dodijelio Samostalni sindikat, tada će predsjednik Sindikata odbiti njegov zahtjev i pismeno obavijestiti člana Sindikata o njegovom pravu da sam privatno angažuje advokata i istom sam snosi sudske troškove.

Član 6.

Svi zahtjevi članova Sindikata za pružanje pravne zaštite se ostvaruju putem Sindikalnog odbora u sindikalnoj organizaciji čiji su članovi, a Sindikalni odbor postupa u skladu sa ovim Uputstvom.

Pravna zaštita u skladu sa ovim Uputstvom, pružaće se isključivo članovima statutarnih sindikalnih organizacija Samostalnog sindikata koji su članovi najmanje 6 mjeseci i redovno uplaćuju članarinu na račun Samostalnog Sindikata u skladu sa Statutom Samostalnog sindikata državnih službenika i namještenika u organima državne službe, sudskoj vlasti i javnim ustanovama u FBIH broj: 01-637-6-1/22 od 24.06.2022. godine,

Član 7.

Svaki član Sindikata koji ispunjava uslove propisane članom 6. Uputstva, ima slijedeća prava:

- pravo na besplatno angažovanje i zastupanje ovlaštenog advokata Sindikata u pokrenutom sudskom sporu tokom čitavog procesa.
- pravo na uplate troškova sudskih taksi od strane Sindikata koji prozilaze iz sudskog spora (taksa na tužbu, vještačenje, presudu, žalbu, prijedlog za izvršenje i rješenje o izvršenju).
- pravo da se dosuđeni iznosi pripadajućih naknada koji se naplate u korist člana Sindikata kojeg zastupa advokat uplate na račun člana Sindikata koji je podnio tužbu, ako se član Sindikata i ovalšteni advokat ne dogovore drugačije.

Član 8.

Svaki član Sindikata kojem je odobrena besplatna pravna zaštita u skladu sa Uputstvom u slučaju pokretanja spora pred nadležnim sudom, ima slijedeće obaveze:

- sve sudske takse koje je su uplaćene za članove Sindikata, u zavisnosti od uspjeha u parnici, odnosno pozitivnog ishoda spora, nakon naplate sudskih troškova, član Sindikata je dužan izvršiti povrat dosuđenih uplaćenih sudske taksi, na način kako je to ugovorenovo sa ovlaštenim advokatom Sindikata i Ugovorom o zastupanju.
- troškovi parničnog i izvršnog postupka uplaćivat će se na račun advokata, na način i pod uslovima iz Ugovora o zastupanju.
- član Sindikata obavezan je da u slučaju sklapanja sudske odnosno vansudske nagodbe odmah obavijesti advokata kojem je data punomoć u navedenom predmetu.
- obavezu da izvrši povrat uplaćenih sudskih troškova ovlaštenom advokatu i Sindikatu koji mu eventualno budu uplaćeni na lični račun po zaključenoj sudskoj odnosno vansudskoj nagodbi.

Član 9.

Stupanjem na snagu ovog Uputstva, prestaje da važi Uputstvo o pružanju pravne zaštite članovima Samostalnog sindikata državnih službenika i namještenika u organima državne službe, sudskoj vlasti i javnim ustanovama u FBIH broj: 01-IV- 3/16 od 04.01.2016. godine

Član 10.

Ovo Uputstvo stupa na snagu danom donošenja, a primjenjivat će se u svim sindikalnim organizacijama Samostalnog sindikata.

